



**PRAVILNIK
O ZAŠTITI OD POŽARA U
RAZVOJNO-GARANTNOM FONDU BRČKO DISTRIKTA BiH**

Na osnovu člana 12. Statuta Razvojno garantnog fonda Brčko distrikta BiH broj: 200/24 od 15. 8. 2024. godine, a u skladu sa članom 9. stav (5) Zakona o zaštiti od požara Brčko distrikta BiH („Službeni glasnik Brčko distrikta BiH“ broj 09/06, 12/11, 19/07, 21/22), Upravni odbor Razvojno-garantnog fonda Brčko distrikta BiH na svojoj 87.-oj sjednici, održanoj 23. 6. 2025. godine, **d o n o s i**

PRAVILNIK O ZAŠTITI OD POŽARA U RAZVOJNO-GARANTNOM FONDU BRČKO DISTRIKTA BIH

I OPŠTE ODREDBE

Član 1.

(1) Pravilnikom o zaštiti od požara u Razvojno-garantnom fondu Brčko distrikta BiH (u daljnjem tekstu: Pravilnik) uređuje se organizovanje, dužnosti i odgovornosti zaposlenih u slučaju izbijanja požara i njihovo učešće u gašenju požara, mjere zaštite od požara, obuka zaposlenih o opasnostima od požara, vrsta i količina opreme i sredstava za gašenje požara, raspored opreme i sredstava i vrijeme povremenog ispitivanja njihove ispravnosti i nadzor nad sprovođenjem mjera zaštite od požara u Razvojno-garantnom fondu Brčko distrikta BiH (u daljnjem tekstu: „RGFBD“).

(2) Cilj Pravilnika je otkrivanje i sprečavanje opasnosti od požara i spašavanje ljudi, materijalnih i drugih dobara ugroženih požarom te organizacija i obezbjeđenje zaštite od požara, uspješno funkcionisanje i učestvovanje u sprovođenju mjera i radnji zaštite od požara.

Član 2.

(1) Zaštita od požara obuhvata skup mjera i radnji upravne, organizacione, tehničke, obrazovne i propagandne prirode koje se preduzimaju u cilju sprečavanja izbijanja i širenja požara, njegovog otkrivanja i gašenja te spašavanja ljudi i materijalnih dobara ugroženih požarom.

(2) Zaštita od požara organizuje se i sprovodi u svim mjestima i na svim objektima koji su izloženi opasnostima od izbijanja i širenja požara.

Član 3.

Zaposleni obezbjeđuju zaštitu od požara obavljajući poslove na radnom mjestu na način i postupkom utvrđenim ovim Pravilnikom te stručnim uputstvima i prema vlastitoj procjeni trenutnih prilika.

Član 4.

Zaposleni „RGFBD“ kao i druga lica koja se nađu u krugu „RGFBD“, dužni su se pridržavati odredbi ovog Pravilnika kao i upozoravajućih natpisa koji su istaknuti na vidnim mjestima u objektima „RGFBD“.

Član 5.

Zaštita od požara je djelatnost od posebnog interesa za Brčko distrikt BiH.

Član 6.

Zaposleni u „RGFBD“ su dužni da učestvuju u gašenju požara i spašavanju ljudi i materijalnih dobara, a „RGFBD“ je obavezan da stavi na raspolaganje sva sredstva potrebna za uspješno i efikasno gašenje i lokalizovanje požara i spašavanje ljudi i materijalnih dobara „RGFBD“ i dobara drugih pravnih i fizičkih subjekata.

Član 7.

Projektanti građevinskih objekata, uređaja, adaptacija i rekonstrukcija u „RGFBD“ i za potrebe „RGFBD“ kao izvođači radova na tim objektima, dužni su pri projektovanju i izvođenju radova da primjenjuju propisane mjere i normative zaštite od požara.

II ORGANIZOVANJE ZAŠTITE OD POŽARA

Član 8.

(1) „RGFBD“ je dužan da u sprovođenju mjera zaštite od požara postupa u skladu sa Zakonom o zaštiti od požara (u daljnjem tekstu: Zakon), planovima zaštite od požara i opštim aktima „RGFBD“.

(2) Stručne poslove zaštite od požara u „RGFBD“ vrši odgovorno lice zaštite na radu i zaštite od požara ili ovlaštena organizacija.

Član 9.

Unutrašnju kontrolu i stabilnost zaštite od požara vrši ovlaštena organizacija.

Član 10.

Unutrašnja kontrola se organizuje u „RGFBD“ sa ciljem kontrole, usmjeravanja i provođenja zaštite od požara koje su utvrđene Zakonom i ovim Pravilnikom.

Član 11.

Unutrašnja kontrola obuhvata:

- a) Periodični pregled i ispitivanje električnih uređaja i instalacija, zamjene dotrajalih i neispravnih dijelova kao i popravak oštećenih uređaja i instalacija;
- b) Kontrolu i uskladištenje eksplozivnih sredstava, lako zapaljivih tečnosti i zapaljivih materijala;
- c) Stavljanje znaka upozorenja na opasnim mjestima, zabrana pušenja i paljenja vatre na opasnim mjestima;
- d) Kontrola čistoće u prostorijama i redovno odstranjivanje lako zapaljivih otpadaka i ambalaže;
- e) Kontrola skladišta robe i drugih materijala u pogledu zaštite od požara;
- f) Kontrola sistema i sredstva vatrodiojave;

g) Kontrolu sredstava i opreme za gašenje požara.

Član 12.

(1) O izvršenoj kontroli stanja zaštite od požara sastavlja se zapisnik u koji se unosi nađeno stanje u pogledu primjenjenih propisa mjera zaštite od požara koji potpisuju lica koja su izvršila kontrolu te isti dostavljaju direktoru „RGFBD“.

(2) Ako se utvrdi da u „RGFBD“ nisu u potpunosti provedene propisane mjere zaštite od požara, direktor „RGFBD“ će odrediti rok da se otklone uočeni nedostaci.

Član 13.

Direktor „RGFBD“ polazeći od svojih uslova i potreba, a u skladu sa propisima o zaštiti od požara, utvrdit će opštim aktom naročito:

- a) radna uputstva koja moraju sadržavati mjere zaštite od požara za sve radne jedinice gde postoji opasnost od požara, uz bližu razradu obaveza prema radnom uputstvu i drugim propisima svakog pojedinog zaposlenog u pogledu kontrole i sprovođenja propisa iz oblasti zaštite od požara;
- b) način vršenja unutrašnje kontrole sprovođenja zaštite od požara te dužnosti, odgovornosti i ovlaštenja zaposlenih koji tu kontrolu neposredno vrše;
- c) postupak i način upoznavanja zaposlenih prilikom stupanja na rad ili raspoređivanja na drugo radno mjesto sa opasnostima od požara vezanim za to radno mjesto kao i način obučavanja zaposlenih u rukovanju sredstvima i opremom za gašenje požara;
- d) prostorije, prostore i mjesta na kojima se ne smije proizvoditi, koristiti ili prenositi otvorena vatra;
- e) vrstu i količinu opreme i sredstava za gašenje požara, raspored opreme i sredstava kao i vrijeme povremenog ispitivanja njihove ispravnosti;
- f) zadatke i odgovornosti rukovodećih zaposlenih u vezi sa sprovođenjem zaštite od požara;
- g) odgovornost zaposlenih zbog nepridržavanja propisanih mjera zaštite od požara;
- h) dužnosti i ponašanje zaposlenih u slučaju izbijanja požara;

Član 14.

(1) Direktor „RGFBD“ i rukovodeći zaposleni, svaki u svom djelokrugu, odgovorni su za organizovanje i sprovođenje zaštite od požara, naročito za primjenu propisanih i naloženih mjera, održavanje u ispravnom stanju i namjensku upotrebu opreme i sredstava za gašenje požara kao i za upoznavanje zaposlenih sa opasnostima od požara vezanim za njihove poslove i zadatke.

(2) O izvršenim ispitivanjima i pregledima vodi se evidencija koja sadrži identifikacioni broj aparata, ime zaposlenog koji vrši ispitivanje i datum ispitivanja.

Član 15.

U organizovanju i sprovođenju, odnosno unapređenju zaštite od požara, direktor „RGFBD“ ima sljedeća prava i dužnosti:

- a) organizuje i nadzire primjenu normativnih akata i propisa iz oblasti zaštite od požara,

- b) odgovoran je za pravovremenu izradu i primjenu Plana zaštite od požara;
- c) utvrđuje način vršenja unutrašnje kontrole sprovođenja zaštite od požara te dužnosti, odgovornosti i ovlaštenja zaposlenih koji tu kontrolu neposredno vrše;
- d) pokreće postupak za utvrđivanje disciplinske odgovornosti za povredu radne obaveze protiv zaposlenih koji je učinio povredu radne dužnosti u vezi sa zaštitom od požara i to u slučajevima kad se zaposlenom treba da izrekne disciplinska kazna prestanak radnog odnosa;
- e) obavlja i druge poslove iz oblasti zaštite od požara koji su utvrđeni pozitivnim pravnim propisima.

Član 16.

(1) Ovlaštena organizacija koja obavlja poslove zaštite od požara dužna je da obavlja sljedeće:

- a) izučava požarne opasnosti u svim poslovnim prostorijama, a naročito u objektima u kojima se nalaze lako zapaljive stvari te druge opasnosti koje proističu iz procesa rada, izrađuje analize, informacije i izvještaje o stanju i problemima u oblasti zaštite od požara te iste dostavlja nadležnim u „RGFBD“;
- b) izrađuje bliža uputstva i upozorenja za objekte gdje se drže, uskladištavaju ili manipuliraju sa vatrogasnim materijama;
- c) učestvuje u izradi prijedloga Pravilnika o zaštiti od požara i Plana zaštite od požara;
- d) priprema nastavne planove i programe stručnog osposobljavanja zaposlenih iz oblasti zaštite od požara;
- e) neposredno učestvuje u osposobljavanju zaposlenih iz oblasti zaštite od požara;
- f) vodi potrebnu evidenciju iz oblasti zaštite od požara;
- g) redovno vrši preglede poslovnih prostorija, a najmanje jedanput u tri mjeseca radi utvrđivanja eventualnih nedostataka i otklanjanja istih koji bi mogli biti uzročnik požara;
- h) obavlja i druge poslove iz oblasti zaštite od požara.

III DUŽNOSTI I ODGOVORNOSTI ZAPOSLENIH U SLUČAJU IZBIJANJA POŽARA I NJIHOVO UČEŠĆE U GAŠENJU POŽARA

Član 17.

Zaposleni u „RGFBD“ su dužni:

- a) da se na svojim radnim mjestima i organizacionim jedinicama upoznaju sa požarnim opasnostima, mjerama i sredstvima za zaštitu od požara, postupcima i dužnostima u slučaju požara i materijalnom odgovornošću i da obavezno poštuju i sprovode sve mjere zaštite od požara utvrđene Zakonom i Pravilnikom;
- b) da se staraju o ispravnosti ručnih vatrogasnih aparata za gašenje požara i drugih sredstava, kao i da se staraju da sredstva za gašenje požara uvijek budu na određenim mjestima i da je omogućen pristup istim;
- c) da nakon svake upotrebe ili aktiviranja aparata za gašenje požara, hidrantske mreže i drugih sredstava i opreme to prijave svom neposrednom rukovodiocu;
- d) da poštuju istaknuto upozorenje i znakove zabrane i traže da se tako ponašaju i drugi zaposleni i lica koja se po bilo kom osnovu nađu u poslovnim prostorijama;
- e) da po završetku rada na radnom mjestu, odnosno poslu, provjere i uklone sve eventualne opasnosti, odnosno izvore i uzročnike požara koji bi mogli izazvati požar

ili eksploziju, a ako to nisu sami u mogućnosti otkloniti dužni su o tome obavijestiti svog neposrednog rukovodioca.

Član 18.

Zaposleni koji primijeti požar dužan je da ga ugasi ako to može učiniti bez opasnosti za sebe ili drugog te u cilju sprečavanja širenja požara isključiti dovod električne energije, odstrani lakozapaljive stvari i preduzme druge potrebne radnje u cilju sprečavanja širenja požara i njegove lokalizacije.

Član 19.

Ako zaposleni ne može ugасiti požar dužan je da o nastalom požaru odmah obavijesti direktora „RGFBD“, neposrednog rukovodioca i druge zaposlene koji se nalaze u krugu „RGFBD“.

Član 20.

U cilju dojave požara, odnosno uzbunjivanja, na vidnim mjestima u objektima „RGFBD“ moraju se istaći telefonski brojevi vatrogasnih društava, zdravstvene ustanove i Policije Brčko distrikta BiH.

Član 21.

Prilikom obavješćavanja o požaru, potrebno je vatrogasnim društvima javiti:

- a) mjesto gdje je požar izbio;
- b) obim požara, odnosno stepen opasnosti;
- c) da li ima povrijeđenih;
- d) ime i prezime zaposlenog koji javlja požar.

Član 22.

Radi efikasnog i nesmetanog gašenja požara i spasavanja ljudi i materijalnih dobara rukovodilac akcije gašenja požara iz vatrogasnog društva može da naredi.

- a) da zabrani pristup nepozvanim licima u blizini mjesta požara kao i saobraćaj pored mjesta požara;
- b) da naredi evakuaciju ljudi i uklanjanje stvari iz susjednih objekata koji su ugroženi požarom kao i da preduzme mjere za obezbjeđivanje stvari koje su evakuisane;
- c) da naredi prekid dovođenja električne energije, gasa ili drugog energeta;
- d) da naredi djelimično ili potpuno rušenje objekta preko koga bi se požar mogao proširiti, ako širenje požara ne može na drugi način da se spriječi;
- e) da ograniči djelimično ili potpuno prekine dovod vode i struje potrošačima u zoni u kojoj se pojavio požar ili čitavom naselju radi obezbjeđenja potrebne količine vode za gašenje požara;
- f) da naredi korištenje vode iz obližnjeg bunara, cisterni, bazena, rezervoara, kanala i slično, a koji pripadaju ili društvu ili drugim pravnim licima, organima, organizacijama, samostalnim radnjama i privrednicima i privatnicima;
- g) da naredi korištenje vozila „RGFBD“ ili drugih pravnih lica, preduzetnika kao i pojedinaca radi prevoženja nastradalih u požaru do najbliže zdravstvene ustanove;

- h) da naredi upotrebu opreme i sredstava koja su u vlasništvu preduzeća, drugih pravnih lica, preduzetnika a koja bi prema procjeni bila potrebna u akciji gašenja i spasavanja;
- i) da nasilno otvori zaključani objekat ili prostoriju radi gašenja požara i spasavanja ljudi i materijalnih dobara a po završetku intervencije obezbijedi objekat do dolaska policije ili vlasnika objekta;
- j) da naredi licima koja žive u neposrednoj blizini mjesta požara, kao i licima koja se zalegnu u neposrednoj blizini mjesta požara, da pruže pomoć u gašenju požara i spasavanju ljudi i materijalnih dobara;
- k) da naredi upotrebu javne sirene radi bržeg okupljanja vatrogasaca.

Član 23.

Do dolaska pozvane vatrogasne jedinice na mjesto požara, prisutni zaposleni dužni su organizovati gašenje nastalog požara, a posebno trebaju učiniti sljedeće:

- a) organizovati spasavanje eventualno ugroženih zaposlenih i drugih lica;
- b) organizovati evakuaciju iz ugrožene zone lako zapaljivih i eksplozivnih materija, otrovnih i vatroopasnih materija, materijala od izuzetne vrijednosti, vrijednosnih papira, novca, tehničke i druge dokumentacije, važnijih mašina i uređaja te motornih vozila;
- c) obezbijediti isključenje struje u objektu „RGFBD“;
- d) zatvoriti odgovarajuća vrata, prozore, ventilacione i druge otvore da se spriječi širenje požara;
- e) obezbijediti na licu mjesta prisustvo odgovarajućih stručnih radnika (električar, bravar i dr.) koja mogu biti od koristi u akciji gašenja požara;
- f) nasilno otvaranje objekata, skladišta i kapija ako je to u interesu akcije gašenja i spašavanja ljudi i imovine;
- g) preduzeti i druge mjere zavisno od date situacije.

Član 24.

Zaposleni koji ne preduzme mjere za gašenje požara čini težu povredu radne obaveze.

Član 25.

Svaki zaposleni odgovoran je ako ne pristupi gašenju požara ili ako napusti akciju gašenja požara prije nego se isti potpuno ugasi. Zaposleni je naročito odgovoran ako:

- a) ne sprovodi propisane mjere zaštite od požara u određenom roku, a i ako usljed toga nisu nastupile štetne posljedice;
- b) ne pridržava se propisanih upustava za siguran rad sa stanovišta zaštite od požara i eksplozija;
- c) neopravdano i bez potrebe daje znak za požar i bez opravdanog razloga odbija da učestvuje u gašenju požara;
- d) neodgovorno postupa sa opremom za gašenje požara;
- e) ostavlja eksplozivne materije i potpaljuje tečnosti i gasove na mjestima koja za to nisu izričito određena;
- f) ne poštuje upustva za skladištenje i znakove upozorenja i zabrane.

IV MJERE ZAŠTITE OD POŽARA

Član 26.

Mjere zaštite od požara u smislu ovog Pravilnika su naročito:

- a) izbor lokacije i dispozicije objekata kao i izbor materijala, uređaja, instalacija i konstrukcija kojim će se spriječiti ili svesti na najmanju mjeru mogućnost izbijanja i širenja požara;
- b) izgradnja prilaznih puteva i prolaza;
- c) obezbjeđenje potrebnih količina vode i drugih sredstava za gašenje požara;
- d) izbor i održavanje tehnoloških procesa i uređaja kojima se obezbjeđuje sigurnost protiv požara;
- e) zabrana upotrebe otvorene vatre i drugih izvora paljenja u objektima i prostorijama u kojima bi zbog toga moglo doći do požara;
- f) način spasavanja ljudi i materijalnih dobara;
- g) postavljanje uređaja za javljanje, gašenje požara i sprečavanje njegovog širenja, uređaja za mjerenje koncentracije eksplozivnih smjesa (gasovi, pare i prašina) i drugih uređaja za kontrolu bezbjednog odvijanja tehnološkog procesa;
- h) održavanje i kontrola ispravnosti uređaja i instalacija čija neispravnost može uticati na nastanak i širenje požara.

Član 27.

U planovima zaštite od požara utvrđuje se naročito procjena ugroženosti od požara, organizacija zaštite od požara, sistem obavješćavanja, postupak u slučaju požara, tehnička oprema i sredstva za gašenje požara, način snabdjevanja vodom, putevi, prolazi i prilazi, sadejstvo sa drugim vatrogasnim jedinicama kao i druge mjere potrebne za uspješno funkcionisanje i unapređivanje zaštite od požara i sprovođenja nadzora nad izvršavanjem mjera zaštite od požara.

1. Mjere kod rada i manipulacije sa bocama tehničkih gasova

Član 28.

- (1) Zapaljive materije mogu se držati i uskladištavati samo u objektima koji su za to podešeni ili preuređeni u skladu sa tehničkim i drugim propisima.
- (2) Na ulaznim vratima skladišta opasnih materija mora biti istaknut popis vrsta i maksimalna količina opasnih materija koje se skladište i čuvaju u skladištu.
- (3) Zapaljivim tečnostima, gasovima, eksplozivnim sredstvima i drugim opasnim materijama mogu da rukuju samo punoljetna lica koja imaju odgovarajuću psihičku sposobnost i koja su za to stručno osposobljena.

Član 29.

„RGFBD“ je dužan da drži u pripravnosti ispravne uređaje, alat i opremu za gašenje požara na mjestima koja su lako pristupačna (podest, hodnik, trijem i sl.), zaštićenim od visokih i niskih temperatura, mehaničkih, hemijskih i drugih oštećenja.

Član 30.

- (1) Boce sa acetilenom, kiseonikom, propan-butanom i drugim gasovima kao i opasne materije i predmeti, mogu se uskladištavati u prostorijama namjenjenim samo za

uskladištavanje ovih materija i predmeta, dovoljno hladjenim i zaštićenim od sunca i drugih izvora toplote

(2) Maksimalno dozvoljena temperatura u skladištima iz stava (1) ovog člana treba da iznosi 22°C, optimalna relativna vlaga 65-70%, električna i gromobranska instalacija izvedena prema propisima sigurnosti od zapaljenja eksplozivnih smjesa.

(3) Boce moraju biti zaštićene od dejstva sunčevih zraka.

Član 31.

(1) U prostoriji skladišta boca sa tehničkim gasovima je dozvoljen smještaj samo onoliki broj boca koje se mogu držati u ispravnom stanju u odgovarajućim ležištima.

(2) U skladištima zapaljivih tečnosti, gasova i predmeta smiju se skladištiti i čuvati samo one vrste i količine materija i predmeta koje su navedene u odobrenju nadležnog ministarstva.

(3) Odvojeno držati boce zapaljivih gasova od boca nezapaljivih gasova, odnosno odvojeno držati prazne i pune boce.

(4) Boce moraju biti zaštićene od pada pomoću obujmica ili lanaca.

(5) Boce se ne smiju bacati i kotrljati niti skladištiti i držati u horizontalnom položaju.

(6) Sa bocama se ne smije rukovati masnim rukama i masnim krpama, na bocama se mora nalaziti zaštitna kapa.

Član 32.

(1) Zapaljive tečnosti i gasovi se nabavljaju samo u količinama koje su potrebne za proces normalnog rada „RGFBD“ i prema kapacitetu skladišta i moraju biti skladištene i čuvane na propisan način.

(2) U užoj zoni skladišta zapaljivih tečnosti i gasova zabranjuje se upotreba otvorenog plamena, alata koji varniči itd.

(3) Uža zona opasnosti iz prethodnog stava je prostor u kome postoji mogućnost stvaranja smješe para, zapaljivih tečnosti, gasova sa zrakom koja se može zapaliti.

(4) Zona opasnosti mora se osigurati od pristupa vozila i ostalih uređaja koja pri radu mogu izazvati iskrnu ili povećano zagrijavanje ambijenta.

Član 33.

(1) Odvijanje tehnološkog procesa u zonama opasnosti, ponašanje zaposlenih i drugih lica u istim, mora biti definisano posebnim radnim uputstvima u kojima će biti navedene sve opasnosti i mjere zaštite od istih.

(2) Granice zone opasnosti kao i njihova posebno opasna mjesta, moraju biti označene posebnim tablama i znakovima sa naznakama opasnosti, upozorenja i zabrana.

Član 34.

(1) Objekti u kojima se skladište zapaljive tečnosti gasovi moraju biti snabdjevena uređajima, sredstvima i opremom za gašenje požara i zaštitu od atmosferskog pražnjenja.

(2) Sredstva za gašenje požara u ovim objektima, moraju biti postavljena na lako uočljivim i pristupačnim mjestima.

2. Mjere kod rada sa električnim instalacijama

Član 35.

(1) Svi glavni razvodi moraju posjedovati odgovarajuću sklopku za isključenje struje u slučaju požara.

- (2) Ispod glavnog razvoda i većih pomoćnih razvoda postaviti atestiran elektroizolacioni prostirač.
- (3) Svi osigurači moraju imati svoje zaštitno staklo, a topive patrone moraju biti originalne i dimenzionisane prema nominalnoj struji pripadajućeg elektro potrošača.
- (4) Nastavljanje provodnika u razvodnim kutijama i u svjetiljkama mora se izvršiti odgovarajućim vjčanim stezaljkama.
- (5) Na mjestima (u objektima) gdje su instalirani „OG“ instalacije, na uvodima kablova u iste mora se izvesti zaptivanje pomoću odgovarajućeg gita ili gume za zaptivanje.

Član 36.

- (1) Svaki uočeni kvar na elektro instalacijama i uređajima obavezno je prijaviti nadležnom rukovodiocu.
- (2) Zabranjeno je neovlaštenim i nestručnim zaposlenim vršiti popravke i bilo kakve intervencije na elektro instalacijama i uređajima, a naročito u zonama opasnosti.
- (3) Zabranjeno je proizvoljno izvođenje i popravljjanje električnih instalacija i upotreba oštećenih, krpljenih, premoštenih osigurača, neispravnih rasklopnih i drugih aparata.

Član 37.

Svi objekti moraju biti zaštićeni od atmosferskog pražnjenja odgovarajućom gromobranskom instalacijom klasične izvedbe.

Član 38.

U objektima u kojima postoji pojava prašine, obavezno je provoditi i održavati dobro zaptivanje el. razvoda, razvodnih kutija, rasvjetnih tijela i drugih el. uređaja kao i periodično čišćenje nataložene prašine sa el. instalacijama i uređajima (mehanički ili na drugi način uz dobru ventilaciju).

Član 39.

- (1) Električne, ventilacione, gasne, naftovodne, toplovodne, gromobranske i dr. uređaji kao i dimovodi moraju se postaviti odnosno izvoditi, koristiti i održavati prema propisanim tehničkim normativima i obaveznim standardima kao i uputstvima proizvođača o čemu mora postojati dokumentacija.
- (2) Instalacije i uređaji iz prethodnog stava kao i dimovodi i ložišta mogu se upotrebljavati samo ako su ispravni i ako su pravilno postavljeni.

3. Mjere za hidrantske instalacije

Član 40.

- (1) Oprema zidnog hidranta mora se stalno držati u metalnom standardnom ormariću koji je označen oznakom za hidrant slovom „H“.
- (2) U blizini zidnog hidranta (do 1,0 m) zabranjeno je držati bilo kakav materijal, a prilaz hidrantima mora uvijek biti slobodan.
- (3) Hidrantska mreža sa svim uređajima i armaturom, mora se pregledati i kontrolisati najmanje jedan put u periodu od najmanje jednu godinu, od strane određenih stručnih lica (pravno lice ili preduzetnik koji je registrovan za tu djelatnost).

(4) Za vrijeme periodičnog pregleda, mora se izvršiti kontrola pritiska i protoka na hidrantima, pregled funkcionalnosti ventila i uređaja, pregled crijeva u ormarićima koja se moraju odmah i detaljno pregledati i oštećene zaptivke na spojkama zamijeniti.

(5) Poslije korištenja, hidrantska crijeva se moraju dobro oprati, osušiti, pravilno namotati i ostaviti u ormariće.

(6) Svi ventili na cjevovodu koji povezuju hidrantsku mrežu sa izvorom vode, moraju biti ispravni i na njima ne smije biti propuštanja vode.

Član 41.

(1) Ako se u toku kontrole utvrdi da pojedini hidranti, ventili i drugi elementi nisu ispravni i funkcionalni, moraju se odmah osposobiti ili zamijeniti ispravnim.

(2) O periodičnoj kontroli instalacije i uređaja mora se voditi odgovarajuća evidencija.

(3) Svi zaposleni moraju biti upoznati sa položajem hidranata (u objektu gdje radi) i pravilnom upotrebom istih.

(4) Spoljni hidranti moraju biti na vidan način obilježeni tablicama sa upisanim rastojanjima koje se postavljaju na najbliže objekte ili na posebne stubove.

(5) U neposrednoj blizini spoljnih hidrantskih priključaka treba držati ormare sa ispravnom opremom (crijeva, mlaznice, hid. nastavak i ključ).

(6) Strogo je zabranjena upotreba hidrantskih instalacija i opreme u druge svhre o čemu se mora stalno voditi računa.

4. Mjere za protivpožarne aparate

Član 42.

(1) Vatrogasni aparati i ostala sredstva za gašenje požara moraju se uvijek držati u ispravnom stanju i moraju biti vidno označeni i pristupačni sa svih strana. Prostor oko ovih uređaja i pristupni put istim mora biti slobodan, a njegova širina ne smije biti manja od 0,80 m.

(2) „RGFBD“ će obezbijediti sljedeća sredstva za gašenje požara:

a) ispred svake razvodne baterije u objektu „RGFBD“ treba postaviti po jedan aparat za gašenje požara punjen CO₂ gasom, sadržaj sredstva minimalno 9 kg ili aparat punjen lakim suhim prahom sadržaj sredstva minimalno 9 kg (S-9).

b) u svim radnim prostorijama, hodnicima, pomoćnim prostorijama i sl. treba postaviti aparate punjene lakim suhim prahom - sadržaj sredstva minimalno 9 kg (S-9).

(3) Vatrogasni aparati moraju se pregledati i kontrolisati najmanje jedan put u periodu od najmanje jednu godinu, od strane određenih stručnih lica (pravno lice ili preduzetnik koji je registrovan za tu djelatnost)

5. Mjere u administrativnim prostorijama

Član 43.

U administrativnim i pomoćnim prostorijama moraju se primjenjivati naročito sljedeće mjere zaštite od požara:

1. Slavljanje opušaka od cigareta i šiblica smije se vršiti samo u posebno, za tu svrhu namjenjene limene posude sa poklopcem,

2. Odbačeni papir i ostali zapaljivi materijali ne smiju se baciti u istu posudu sa opušcima,

3. Čišćenje podova u radnim prostorijama ne smije se vršiti zapaljivim tečnostima,

4. U radnim prostorijama zabranjena je upotreba električnih uređaja kao što su rešo, električne grijalice i sl.

Član 44.

Po završetku radnog vremena na administrativnim i pomoćnim prostorijama provode se naročito sljedeće mjere zaštite od požara:

1. Isključuju se svi električni potrošači (električne pisaće i računarske mašine i mašine za automatsku obradu podataka),
2. Opuške i drugi otpadni materijal iznosi se izvan radnih prostorija i smješta u određene posude.

6. Opšte mjere

Član 45.

Putevi, prilazi i prolazi moraju biti slobodni za nesmetan prolaz i eventualnu intervenciju i moraju biti na odgovarajući način označeni i slobodni od stvari koje bi mogle otežati preduzimanje mjera gašenja požara ili spašavanje imovine i ljudi.

Član 46.

„RGFBD“ je obavezan držati u pripravnosti odgovarajuće sprave, alate i druga sredstva za početno gašenje požara kao i vršiti redovnu kontrolu istih prema uputama proizvođača odnosno standardima.

Član 47.

Kao sprave za početno gašenje požara u smislu prethodnog člana smatraju se sve vrste vatrogasnih aparata kao što su: aparati za vodu, hemijsku pjenu, suho gašenje ili ugljen dioksid i drugi odobreni aparati kao i priručna sredstva i oprema za gašenje požara kao što su posude sa vodom, posude sa suhim pijeskom, alati itd.

V OBUKA ZAPOSLENIH O OPASNOSTIMA OD POŽARA

Član 48.

(1) „RGFBD“ je dužan da obezbijedi da se svi zaposleni prema posebno utvrđenom programu, upoznaju sa opasnostima od požara vezanim za poslove i zadatke na koje su raspoređeni kao i sa mjerama i sredstvima za gašenje požara, praktičnom upotrebom priručnih aparata, uređaja i opreme i sredstava za gašenje požara i sa materijalnom i drugom odgovornošću zbog nepridržavanja propisanih mjera zaštite od požara.

(2) „RGFBD“ je dužan da najmanje jednom godišnje vrši provjeru znanja zaposlenih iz prethodnog stava o čemu mora postojati dokumentacija.

Član 49.

Prilikom stupanja zaposlenih na rad, odnosno prije njegovog raspoređivanja kao i u slučaju raspoređivanja zaposlenih sa jednog radnog mjesta na drugo radno mjesto na kojem su promijenjeni uslovi rada, opasnosti i mjere zaštite od požara, „RGFBD“ je dužan upoznati zaposlenog sa opasnostima i mjerama zaštite od požara, odnosno sa praktičnim rukovanjem aparatima i sredstvima za gašenje požara vezanim za radna mjesta na koja se raspoređuju.

Član 50.

U cilju obučavanja zaposlenih sa opasnostima, mjerama i sredstvima zaštite od požara, odnosno sa praktičnom primjenom aparata i sredstava za gašenje požara, „RGFBD“ je dužan donijeti plan i program obuke te propisati način provjere znanja zaposlenih.

Član 51.

Provjeru znanja zaposlenih iz oblasti zaštite od požara kao i praktično rukovanje sa aparatima i sredstvima za gašenje požara, „RGFBD“ je dužan vršiti najmanje jedanput godišnje o čemu mora postojati odgovarajuća dokumentacija.

Član 52.

O izvršenoj obuci i provjeri znanja iz prethodnog člana ovog Pravilnika, mora se voditi odgovarajuća evidencija koja sadrži:

- a) datum vršenja obuke, odnosno provjere znanja;
- b) ime i prezime lica, odnosno naziv organizacije koja je vršila provjeru znanja iz oblasti zaštite od požara;
- c) osnovne podatke o licima koja su pristupila obuci, odnosno provjeri znanja, kao i način provjere znanja;
- d) podatke o pokazanom znanju prilikom vršenja obuke, odnosno provjere iz oblasti zaštite od požara;
- e) zaposleni koji ne pokaže odgovarajuće znanje biće upućen na ponovnu obuku i provjeru znanja iz oblasti zaštite od požara.

Član 53.

Upoznavanje i obučavanje zaposlenih sa opasnostima i mjerama zaštite kao i sredstvima zaštite od požara, odnosno sa praktičnom upotrebom aparata i sredstava za gašenje požara vrši se na pogodan način kao:

- a) organizovanje seminara, kurseva, predavanja, prikazivanje filmova i slično,
- b) izdavanje skripti i brošura,
- c) organizovanje demonstracija i praktične upotrebe vatrogasnih aparata i drugih sredstava insceniranjem požara.

VI VRSTA I KOLIČINA OPREME I SREDSTAVA ZA GAŠENJE POŽARA, RASPORED OPREME I SREDSTAVA I VRIJEME POVREMENOG ISPITIVANJA NJIHOVE ISPRAVNOSTI

Član 54.

(1) „RGFBD“ obezbjeđuje redovnu kontrolu ispravnosti ručnih i prevoznih aparata za gašenje početnog požara kao i hidrantske mreže, prema uputstvu proizvođača, odnosno prema utvrđenim standardima.

(2) Kontrolu ispravnosti vatrogasnih aparata za gašenje početnih požara kao i kontrola ispravnosti hidrantske mreže, mjerenje pritiska hidrantske mreže, kontrola opremljenosti i kompletiranosti hidrantskih ormara vrši se u periodičnom razmaku od jedne godine.

(3) Kontrolu ispravnosti i ispitivanje aparata iz stava (2) ovog člana, koji se nalaze u prometu i upotrebi, može da vrši pravno lice ili preduzetnik koji je registrovan za tu djelatnost ili organizovani servis za kontrolu vatrogasnih aparata u okviru organa javne uprave ili javne ustanove koji imaju odgovarajuću tehničku opremu, poslovni prostor i stručne radnike i koji za to dobije odobrenje od nadležnih organa

(4) Na vatrogasnim aparatima moraju postojati etikete servisne radionice iz kojih će se vidjeti kada su kontrolisani, datum sljedeće kontrole, potpis lica koje je izvršilo kontrolu i ovjeru pečatom.

(5) O svemu navedenom u ovom članu, „RGFBD“ vodi posebnu evidenciju koja se sastoji od knjige evidencije kontrolisanih aparata, zapisnik o kontroli aparata, zapisnik o mjerenju pritiska i kontroli hidranstke mreže i karticu ili odgovarajuću naljepnicu sa potrebnim podacima koja se postavlja neposredno na aparat.

Član 55.

(1) Do donošenja Plana zaštite od požara „RGFBD“ će obezbjediti sljedeća sredstva za gašenje požara:

(a) ispred svake razvodne baterije u objektu „RGFBD“ postaviti će se po jedan aparat za gašenje požara punjen CO₂ gasom, sadržaj sredstva minimalno 9 kg ili aparat punjen lakim suhim prahom sadržaj sredstva minimalno 9 kg (S-9).

(b) u svim radnim prostorijama, hodnicima, pomoćnim prostorijama i sl. postavlja se po jedan aparat punjen lakim suhim prahom sadržaj sredstva minimalno 9 kg (S-9)

(c) u prostoru kotlovnice minimalno 2 komada aparata za gašenje požara punjen CO₂ gasom, sadržaj sredstva minimalno 9 kg ili lakim suhim prahom sadržaj sredstva minimalno 9 kg (S-9).

Član 56.

(1) Vatrogasni aparati i ostala sredstva za gašenje požara moraju se uvijek držati u ispravnom stanju i moraju biti vidno označeni i pristupačni sa svih strana.

(2) Prostor oko ovih uređaja i pristupni put istim mora biti slobodan, a njegova širina ne smije biti manja od 0,80 m.

Član 57.

U zimskom periodu hidranti, posude sa vodom za gašenje požara, moraju biti zaštićeni od smrzavanja.

Član 58.

(1) Vatrogasna oprema kojom raspolaže „RGFBD“, može se koristiti samo za obuku, gašenje požara i otklanjanje posljedica elementarnih nepogoda.

(2) Potrebne sprave, alate i opremu za gašenje požara nabavlja „RGFBD“ u skladu sa potrebama zaštite od požara.

VII NADZOR NAD SPROVOĐENJEM MJERA ZAŠTITE OD POŽARA

Član 59.

Inspeksijski nadzor nad provođenjem mjera zaštite od požara propisanih ovim Pravilnikom, Zakonom i Planom zaštite od požara kao i nad provođenjem propisa o tehničkim normativima u pogledu zaštite od požara, vrši inspektor za zaštitu od požara.

VIII PRELAZNE I ZAVRŠNE ODREDBE

Član 60.

Za sva prava, dužnosti i odgovornosti zaposlenih iz oblasti zaštite od požara koji nisu regulisani ovim Pravilnikom važe odredbe Zakona.

Član 61.

Izmjene i dopune ovog Pravilnika vrše se po postupku za njegovo donošenje.

Član 62.

Ovaj pravilnik stupa na snagu danom donošenja.

Broj: 242/25

Brčko, 23. 6. 2025. godine



Predsjednik Upravnog odbora

Zrinka Grabus, prof.